

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
Broj: 43 0 Ip 245715 24 Ip  
Zenica, 04.11.2024. godine

Općinski sud u Zenici, sudija Mirhunisa Hamzić, u izvršnom postupku tražitelja izvršenja Zeničko- dobojski kanton koga zastupa Kantonalno pravobranilaštvo Zenica, protiv izvršenika Rudnik mrkog uglja „Zenica“ d.o.o. Zenica, ulica Stjepana Radića broj 2., Zenica, radi naplate novčanog potraživanja, vrijednost predmeta spora 450,00 KM, odlučujući o prijedlogu za izvršenje od 14.05.2024.godine, vanraspravno, donio je dana 04.11.2024. godine sljedeće:

#### RJEŠENJE

Odbacuje se prijedlog za izvršenje od 14.05.2024.godine kao nedopušten.

#### Obrazloženje

Dana 14.05.2024. godine, tražitelj izvršenja je podnio ovom sudu prijedlog za izvršenje protiv izvršenika, na osnovu izvršne isprave, Rješenja Općinskog suda u Zenici broj 43 0 Rs 191664 20 Rs od 17.05.2021.godine, a radi namirenja potraživanja tražitelja izvršenja u iznosu od 450,00 KM .

Dana 02.04.2024. godine, Vlada Federacije Bosne i Hercegovine donijela je, na hitnoj sjednici, Odluku o finansijskoj konsolidaciji izvršenika, odnosno privrednog društva RMU Zenica d.o.o. – Zenica. Ova odluka objavljena je u Službenim novinama FBiH dana 05.04.2024. godine.

U članu 9. Odluke o finansijskoj konsolidaciji izvršenika stoji da stupa na snagu danom donošenja, što znači da su pravne posljedice pokretanja postupka finansijske konsolidacije izvršenika nastupile danom stupanja na snagu Odluke o finansijskoj konsolidaciji, odnosno dana 02.04.2024. godine.

Odredbom člana 9. Zakona o finansijskoj konsolidaciji ("Službene novine Federacije BiH", br. 52/2014, 36/2018, 54/2019, 48/2021 i 94/2023) propisano je da u toku postupka finansijske konsolidacije ne mogu se pokrenuti postupci prinudne naplate potraživanja nad imovinom društva sa većinskim učešćem državnog kapitala koje se konsoliduje.

Osim toga, Vrhovni sud Federacije BiH u svojoj Odluci broj 51 0 Rs 068824 16 Spp od 30.09.2016. godine izražava pravno shvatanje da svi postupci izvršenja koji su pokrenuti prije stupanja na snagu odluke o finansijskoj konsolidaciji se nastavljaju, dok će se

prijedlozi za pokretanje postupka izvršenja, koji su podneseni nakon stupanja na snagu Odluke o finansijskoj konsolidaciji, odbaciti.

S obzirom na citiranu odredbu Zakona o finansijskoj konsolidaciji i izraženo pravno shvatanje Vrhovnog suda FBiH, ovaj sud cijeni da je prijedlog za izvršenje nedopušten, te da ga treba odbaciti. Naime, u konkretnom slučaju Odluka o finansijskoj konsolidaciji izvršenika je donesena 02.04.2024. godine i tog dana je stupila na snagu (član 9. Odluke), a tražitelj izvršenja je podnio prijedlog za izvršenje dana 14.05.2024. godine, dakle, nakon stupanja na snagu Odluke o finansijskoj konsolidaciji.

**Ovakav stav je zauzeo i Kantonalni sud u Zenici u više odluka, tako u svojoj odluci broj 43 0 Rs 220054 24 Gži od 12.06.2024.godine.**

S obzirom na navedeno, sud je odlučio kao u dispozitivu.

**PRAVNA POUKA:**

Protiv ovog rješenja može se izjaviti žalba u roku od 8 dana od dana prijema rješenja. Žalba se podnosi Kantonalnom sudu u Zenici, a putem ovog suda

**S U D I J A**

Mirhunisa Hamzić